

ALL NATIONS GOSPEL PUBLISHERS



www.angp-hb.co.za



info@angp.co.za

NĒM MUT TĒMPEL NYAMBE TO LE NDAP NSON SATAN

Kaat ini i ta bé yondo. Ibôk pam ngéda bisu i loñ Pulassi [French] bebe ni 200 nwi len ini. Ngandak dikôô ni dikôô di mimbu mi bôt mi bi kuhul mapupi ni ngandak masoda mu. I ngwélana kiki léman i mbu, hala nyen ngandak bôlôm ni bôda ba bi léba libak li miñem nwap mu, nlélém kiki Nyambe nyemete a ntehe nwo. Ngandak i kété yap ba bi tehe libak libe li ñem wap, ndi mbus hala ba bi tam, ba hiel ñem, jon ba bi la kôs ñem yondo ni mbu u yondo.

Ntel ngéda u ñañ kaat ini u bénga hoñol le i yé léman i ñem, het u yé le u téé wemete. To u yé ngi hémlé, to u yé nhémle Nyambe, to u yé mbus ntôñ, w'a léba titii yoñ wemete, nlélém kiki Nyambe a ntehe we. Nyambe a ntodol bé mut, A mbéngé ndik ñem mut, ndi ha su wé bé, to libak li koo nyu bé.

Satan a yé isañ bôt ba bitembe bobasô, nwet jiibe ni nyambe nu nkoñ isi unu. A nla yilha nyemete wee ngoñle angel mapupi, ndi a ta ha bé angel mapupi kiki jôga li bôt ba mbéna kéda nye, ndi ba unbak ngéda ba ntehe titii i i ntibil unda banga libak li Satan. Nlélém kiki dilo di mbus, balét ba bitembe ba ntôl dilo dini, bagwel nson ba mandon ba ba nene wee ngoñle ba yé baôma ba Kristô. Ndi hala a nlama bé hélés mut, lakii Satan nyemete a nhéñba le a yé angel mapupi [Korintô ba 11:13-14]. Satan a gwéya i kwés mis ni mimbu mi bôt ndim, le ba tiga le ba tehe gwéha Nyambe ni lipém jé, ni ngui yé, ndi to tehe nkobol wap le Yésu-Kristô [Korintô ba 4:4]. Bôt nyambe nu nkoñ isi unu a mal kwés ndim ba nla ha bé tehe le ba ñôôp ni jôp ngwé ni ngwé nyoo i tjiba i boga, i kété bee-hié i ngi libôngô, i i nloñ ni solfa. Bôt ba ba bi wo i pes Nyambe nu niñ, jon mbu u nyambe nu nkoñ isi unu u ñane bo [Efésô 2:2].

Man Nyambe a bi lo le a ôbôs minson mi nsohop [Yôhanes bisu 3:8]. "Suhlana bé bomete isi Nyambe. Kolbana Satan ndi a ke bé ngwé. Kôôgana bebe ni Nyambe ndi nyek a ga kôôge bé bebe [Yakôbô 4:7-8].

Ngéda u ñañ kaat ini ni bénge bititii gwé, u yé le u nun kété yoñ ñem. Nwas le ñem woñ u wéna, le ndi u la tehe libak jé. Ibale u nléba le ñem woñ u yé béba, u pénda bañ ndi to sô jam lini, ndi neebe hala ndi u pahal ki bibéba gwoñ. “Ibale di nkal le di gwé bé béba, wee di nlôk bés bomete, ndi maliga ma ta yaga bé ikété yés.” Iba ni le di mpahal bibéba gwés, Nyambe a yé maliga, a téé ki sép i nwéhél bés bibéba ni pubus bés inyu ngitelepsép yosôna. Ibale di nkal le di maa boñ bé béba wee di nyilha Nyambe mut bitembee, ndi banga yé i ta bé ikété yés.” [Yôhanes bisu 1:8-10]. Suhul wemete isi woo u ngui u Nyambe, le ndi a la nwéhél we bibéba gwoñ, ni pubus we lôñni tik matjél i Yésu-Kristô.

U yé ñange to ni Nyambe to ni Satan. Uyé nkol béba to le ngwel nson nu Nyambe. Ibale béba yon i ñane nom yoñ, u sô bañ jam li. Ndi lôndôl ndik Nyambe nu a nla yilha we ngwélés i Yésu-Kristô. Nyen a bi lo hana nkoñ isi unu i tohol baboñ béba ni yibil mis ma bôt ba ndim, i héa ni luhul juibe li li yé i kété yés. Nyen a bi lo le a téé bés ikété mapupi mé ma nlôha loñge. Yésu a bi lo le a kobol bés isi ngui béba ni i Satan. Ni Nye nyen di nla ndik yémbél béba. Tibil yi le: u téé yaga bisu bi Nyambe nu mapupi. Nu a nyi ni tehe hi yaga ligwélél joñ lisôli, yak ni mahoñol ma ñem woñ. U ta bé le u la sô wemete to magwelek moñ i jis li Nyambe. “Nu a heg ôô ba a ñoga bé? Nu a uñgus jis ba a nteha bé? [Tjémbi di David 94:9]. “Inyule mis mé ma nun manjel ma mut, ndi a ntehe ki mahiumul mé momasô. Jiibe to yie nyemp bi ta bé, homa bagwel béba ba nla solbene [Hiôb 34:21-22]. Ñ Yéhôva a nleñ mis mé ngi nkoñ isi wonsô inyu lédés ba ba mal ti Nye miñem nwap ngim.” [Krônika ba 16:9 añ ki Yôhanes 2:24]. Masoda ni nu lilel jé li mbén li nwéhlana, béba yé ki i huba. Masoda ni mut Yéhôva a ñéñél ha bé nye liboñok jé libe, to i kété mbu wé ki mandon ma ta bé.” [Tjémbi di David 32:1-5 añ ki Tjémbi 51]. Yésu a ngi séblak bés i len ini le: “Lona meni a bé bobasôna ba ni nwaa [béba], ni béga ki mbege i nyét, me me nti bé noi.” [Matéô 11:28-30].

TITII BISU

Titii ini i ñunda ki i yé ikété ñem u ngi nhémle, to u mboñ béba nu munlôm to nu muda nu a ngwés nkoñ isi, nu a yé ngi gwéé yondo, nu a yé nkol u mbu nkoñ isi, ni u bisômblene bi minheña mi minsôn. Titii ini i yé banga léman i ñem wé, nlélék kiki Nyambe a ntehe wo. Manuna mé ma yé puye puye,

mis mé ki ma nkôyôp ni matjél, hala a yé biyimbne bi lihiua [Añ Bingéngén 23:29-32]. “Inyu yen nlon dok u nôôga le: ngoo ni me? to le: Wééi? Nje a gwé bikôyôp bi mis? Ñ inyu bôt ba ntégbaha ngéda yap inyu maok; ba ba nyéñ ndigi maok



ÑEM U MBOÑ — BÉBA

ma gwé ngui. U nun bañ wai i gwé longe likôyôp, i i mbai mu i tómbld, ndi i kulak ki longe; lisuk i nkoogana kiki nyoo, i ñôma ki kiki péé. Mis moñ ma nun yaa bôda ba ndénk, ñem ki u nyoña mu i kété gwanga bi mam.

Béngé isi ño mut u nla tehe ñem mut homa mintén mi binuga ngandak mi yéne, binuga bi gwon bi yé biyimbne bi mintén mi bibéba ngandak bi yé kété ñem mut. Nem u yé liyéne to le lap i béba. Nyambe a nkal le: “Ñem mut u yé malôga iloo ihéga, ndi u yé ki mandon hala. Nje a yé le a yi wo. [Yérémiá 17:9]. Yésu Nye.: Nyoo i kété miñem mi bôt, nyen mahofiol mabe, ma nlôl: mimbok, bo wip, bo manola, bo ndénk, bo tama, bo bébañem, bo mandon, bo biyabda, bo jis li njôñ; mam mabe mana momasôna ma nlôl ikété. ma hindhak ki mut [Markô 7:21-23].

KUNDI.

Hégél nuga di mbôk tehe munu ikété titi ini i yé Kundi. Kundi i yé yimbne i ngôk. I yé hinuni hila, ni biléé bi lam jôga yaga. Kundi i mpôôna “Kiñe i Babilôn”, “Lusifer”, hiôdôt hi mbai ni hi mayémakel, Kérôbim i ba tat kôba, mbege mapupi nu Nyambe. Ndi ngôk wé u ngi nwaa u bi tinde nye i kolba Nyambe; wo ki won u bi kwés nye letee ni i bee-hié. Jon a bi témb ñoo Nyambe, Satan, jôl jé ki le Nsohop. [Yésaya 14:9-17; Esékiel 28:12-17].

Ngôk u nene ngandak manjel. Bôt bahogi ba nyadbene nkus wap, to mabémba map ma bilém, to mandap, to minkofil nwap mi maén ni kakaô, to mambot map ma nhee ngandak ndamba, bape ba nyadbene bilama bi masu map, to bi manyu map, bon ba nhumbul manyu i nya i nkwéha bôt bape. Bôt bape ki ba gwéne ngôk inyu loñ yap, to inyu yi, to inyu ngui yap, to linenge li koo yap nyu, to i mam makeñi ma lipém li nkôñ isi ba ngwel. Bape ki ba nheñ i lémés manyu map ni gwom ki bo: balonde, ni bo dimbônga, ni bo mintén ni mintén mi dikep masu map, ni manyu map, ni bo i kek njôlô masofil.

Ndi Nyambe a bi mal hek nyu mut longé. Nyambe a nkolba bôt ba ngôk, ndi a nti bôt ba nsuhul nyu masoda ma nlôôha. [Pétrô bisu 5:5]. Nyambe a ñoo ngôk ni miñagla [Bingéngén 8:13]. Lisuk li ngôk li yé tjiba yak mahofiol ma lipamal ma nkwéha. [Bingéngén 16:18].

NGWO.

Ngwo i yé yimbne minheña mi minsôn, ni mahindi, ni ndénk ni biyôgda Ngwo i nhindis yomete to he i ntagbene. Ngandak bôt ipe i yé hala. Nlélém ngéda ba mpam homa, ba mbôdôl yéñ manjel ma ndénk. Ndénk ni biyabda bi nlôha bôl munu lisuk li ngéda lini i nya i nwéha nyu. Wanda bôt u nla ha bé gwel manyu map, to ba yaga ba yé mbiinaga; ngandak yon i niñil i kété ndénk. Yak li laana baso bôlôm

kiki Sôdôm, li ntôl ikété ngandak biniñ bi bôt. Bibanga bi Yésu bi nyon toi le: dilo di nsôk di ga ba kiki dilo di Sôdôm ni Gômôra. Libak li len lini li tane bé ndiki ikété bôda ni bôlôm ba ba yé bo ngi-yi Nyambe, ndi li njôp letee ni ikété mandap ma bôt ba bi base, ba ba nsébla le: Bahémle Nyambe. Libak li ndénk lini, li nene letee ni i kété bisuku!u gwap.

Matén mahogi ma Afrika ki bo: “Zulu ni bo Basutô”, ba nsébél bôt ba ndénk ni ba biyabda le “Ngwo”, inyule ba nyi bé wo-nyu. Mintén mi bôt mi, mi ga kôdôl bé ane Nyambe. “Ndi ngwo i yé nyoo i tan, ni bagwel makañ, ni bôt ba ndénk, ni ba manola, ni babégés bisat, ni himut a ngwés bitembe a boñok ki gwo. [Masoola 22:15]. Kena ndénk ngwé ni mintén mi biyabda nwominsôna. To umbe nten béba mut a mboñ u ñadbe bé nye nyu; ndi nu a nke ndénk a mboñ nyu yé yomete béba. Kiyo? Ba ni nyi bé le manyu manan ma yé témpel Nyambe? Ibale mut a nhindis témpel Nyambe, hala a yé le nyu yé, nyen Nyambe a ga ôbôs. Inyule témpel Nyambe i yé pupi, yon bé ni yé. [Korintô bisu 6:15-20 ni 3:16-18].

NGÔI.

Hana ngôi i yé yimbne bibéba bini le lihiua ni mbéna je. I yé nuga mahindi, i nje to kinje i ntehe, to i yom i i yé mapupi to i vé mahindi. Hala nyen ñem u yôni ni béba u yé. U nleege mintén mi binigana nwominsô, ni mapôdôl momasô, ni maéba ma mintén mi bikaat nwo minsô, ni bititii bibe gwobisôna. Nyu mut i bi héga ndigi le i yé témpel Nyambe nu niñ; ndi yon bôt ba mbéna hindis ni gwom kiki bo: liôt nson, liôt siba to béba kai ini le “banga”, i i numbus nhébék, ni nyo béba njiñ, i tinak ki mbôñ matjél, i tindge ki mut i bana ngim bakén ba bilem bi nwéha nyu, i kwéha ki nkaa. Hanano lem liôt gwom bi i nyoña bôlôm ni bôda iloo ngéda bisu. Satan a mal gwel i bôt bana minkôm ni ngôñ liôt siba. Ndik ni ngui Nyambe nyen bôlôm ni bôda ba ba nla léba kobla ni lem mahindi ini i yé le i nsuhul libak li mut.

Wanda to mimañ mi bôt ba nhoñol bé le i yé béba i hiô maok ki bo wai, bie ni bilam bipe. Ndi mut lihiua nyekinye a kôdôl bé ane Nyembe. Bie to maok bi ta bé bijek, ndi bi yé ya binyonyo bi aola, ngéda bi mpungul boña i nya i yé le, bôt ba nyo ba ngwel mam kiki bijôñ bi bôt, ni boñ mam ma biyabda: ba nla nol ndi to nolba bomete, jam ba nla bé gwel ngéda ba yé ngi nyo. Inyule maok ma nlôga yak bilam bi nlon lisanda; to nje a nwas le i gwom bi bi nimlaha nye a ta

bé mut pék. [Bingéngén 20:1]. Isi mbén Mósé ibale mut a gwe man a mboñ mam mabe: ndok to lihiua, ba bé lama òm i mange wanda nu ngok ni nol nye [Ndimba mbén 21:19-21]. Bôt ba mboñ maok to bie to mintén mi bilam mimpe mi mi nhiuha, yak bo ba nkwo nkaa nlélém kiki banuñul ni banyo, inyule kaat Nyambe i nkal le: Mbombe ni mut a nyus mut numpe, ni we nu u nhôô nye, letee a hiô [Habakuk 2:15]. Ni lôgba bañ: to bôt ba ndénk, to babégés bisat, to ba yaga ba nlaana baso bolôm, to bôt ba wip, to bôt ba ngadla, to ba lihiua, to ba yaga ba ñôbôs bôt môi, ba kôdôl yaga bé ane Nyambe. [Korintô bisu 6:9-10].

Ndi minson mi minsôn mi nyiba, ndôñ i hogi kiki ndénk, biyabda, libégés bisat, lijés bôt mbôñ, ni makañ, ôa, mindañ, ñem jomol, nyôba ni mam mape hala. Bôt ba ngwel ndôñ mam ini ba kôdôl yaga bé ane Nyambe [Galatia 5:19-21]. Ni hiôô bañ maok, to bie, to wai, inyule bi nkena i tjéna; ndi yona ni Mbu-Mpupi [Efésô 5:18].

Bôt nyus i gwé, Yésu a yé lingen li niñ, a nsébél bo, Nye: Ibale mut nyus i gwé nye a lo meni, ndi a nyo malép ma niñ, yanga yanga [Yôhanes 7:37-39]. “Ô, to nje nyus i gwé a lo lingen, yak bé ba ni gwé bé moni, lona soma, ni je, ñ lona, soma ibabé moni, ibabé ndamba, maok ni manyuñ. Inyuki ni ñôbôs moni minan inyu gwom bi bi ta bé bijek, ni tumba ga ki inyu gwom bi bi nuus bé bé?” [Yésaya 55:1-2].

KUL.

Kul i yé yimbne i béba lem i yeñgi, yak ni lem i bugus mam inyu kel ipe, ni lem makañ “Liemp”. Ngi-top-hémle i yé nlélém kiki béba makañ. Mut yengi a nkwo ngandak dipa di manoodana [Bingéngén 21:25-26]. A ngwés wip iloo nson, hala a ntinde ki nye manola. Hala ki nyen yak yengi i mbu i nsôña ki bés masoohe, ni añ kaat Nyambe, ni ke makoda ma mitin. I nsôña ki bés i tibil wan banga i Nyambe i i nti bés niñ boga. [Lukas 13:24].

Kaat Nyambe i niiga bés le: Nu a nyéñ a léba [Matéô 7:8]. Ni le: Ibôdôl dilo di Yôhanes Nsôble, letee ni hanano, ane ngi i nyôña ni ngui, ndi bôt ba ngui bon ba nkadal yo. [Matéô 11:12].

Libugus mam inyu kel ipe li yé i nip ngéda, li nkena ki i tjiba. Ngéda Nyambe a nkwélés we, ni tinde we le u ti nye ñem woñ len, kunda yada yak Satan a nlo ngwé ni kal we le:

bemp yani, to le, bemp kel ipe yon ya ba longe ndi bebek i kel ipe i y'a ba ha bé kekikel. Hikel nye we le bemp yani, nwi i mbus nwi, letee kel nyemp i puhe we, ndi u wo ki ngi Nyambe, ngi tohi, ngi Kristô, ngi bot ñem. Jon Nyambe a nkal bôt bobasô le: “i len ini, ibale ni nok kiñ yem, ni néyés ha bañ miñem minan. [Lôk Héber 3:7-8]. Bôt bañen ba nwo ngi tohi inyu béba lem li bugus ngéda? ndi ba hôya le yani a ta ha bé i wap.

Bôt ba makañ ba mbéna gwélél mbus kul, ba yegek njék. Jon i yé ki yimbne i bôdôl makañ ñem, ni bisat, ni i gwélél ki gwo, iloo hémlé Nyambe nu niñ. Ngéda kon, to i ngéda ndutu, bôt ba ngwés bé lôndôl Nyambe nu niñ, ndi ba nigbene yaa bisat, ni makañ, ni bo minkañ mi biee, ngok, toñ, ni gwom bipe mut-makañ a mbéhe bo i boñ, ni yéñ: i homa ba lamga ndigi bôdôl Nhek wap ni Ntohol wap ñem. Yéhôva a ntéé maké ma mut, a nkon ki masé inyu njel yé. To a nkwo, a nkwo bé béba likwok; inyule Yéhôva a nlédés nye ni woo wé. [Tjémbi 37:23]. Inyule, bédhana mut i nlôl bé likôl to hiônk, ndi to i nwel-mbok yaga; ndi Nyambe nyen a nkéés, a nsuhus wada, a bédhak numpe [Tjémbi 75:67]. Nyambe a béhe bon ba Israël le: “W'a niñis bé mut-makañ kekikel [Manyodi 22:18]. Mut mis-mana, to mut-makañ, to mbo-ngambi, to mpôdôs ni nsébél mimbu-mimbe, to “malam”, to nsébél bawoga, ba lébna bañ i weni; inyule to nje a nlébna i gwel i mam mana, a yé ntiihege i mbom Yéhôva Nyambe [Ndimba mbén 18:10-12]. Ndi ngwo i yé nyoo i tan, ni bagwel-makañ, ni ba bégés bisat, ni hi mut a ngwés bitembe a boñok ki gwo. [Masoola 22:15]. Ni ke bañ ki to yak bôt ba mpôdôs mimbu mimbe, to ba bo-ngambi, i tiga le ni nyogba mahindi ni bo lôñ. Me yé Yéhôva Nyambe nan. [Lôk Lévi 19:31]. Ngéda ba nkal bé le: Kena yak “malam, to yak mbo-ngambi, to i bet ba nsébél bawoga, to i bôt ba lép-liemp, timbhana le: Ba litén li ga lôndôl bé Nyambe wé? Ba liga ke i sébél bawoga i hôla ba ba yii yômi? Heni, di témp lipôdôl li Nyambe, ni i bok mbôgi yé; ndi ibale di mpot bé hala, ki kel y'a yél bé i hiai hini. Ndi ibale ba mpot bé kiki bibanga bini, ki mapupi m'a béyéi bé bo [Yésaya 8:19-20]. I bale mut a nke yag ba bo-ngambi, ni bapôdôs mimbu-mimbe, ni pôdna ni bo, Me ga nun ha bé me nye, me ga héa nyc i kété litén jem. Pubhana ki bé bomete, bana ki mapupi, inyule me yé Yéhôva nu a mpubus bé. [Lôk lévi 20:6-7].

Yésu-Kristô nyen a mélés mbu, ñem ni nyu. A nwéhél malel més ma mbén ni mélés ki makon més momasô [Tjémbi

103:3]. B'a mut i kété nan a nkon? A sébél mañ mi ntôñ [ndi ha dokta bé] le ba soohene inyu yé. Masoohe ma hémle ma ntohol nkokon, ndi Nwet a téé nye. Pahlana bibéba binan bé ni bé, soohana ki wada inyu numpe, le ndi ni ga mbôöp. [Yakôbô 5:14-16]. Ntel ngéda u ñañ man kaat nunu, Nyambe a nkwélés we le u tam béba yoñ, ni hiel ñem, le u ti nye niñ yoñ. Nlélém ngéda nyen mbu-mbe u kul u u yé i kété ñem woñ u nkal we le: U pahal bañ len, bemp yani to le kel i pe, ndi w'a hiel ñem; kônde bemp sonde i nlo, bep yaga nwii u nlo, hala a kôli. Ni ki le: Bôk ndugi bat nlô woñ, to nwaa woñ, to isoñ to nyuñ, le ndi u yi ndugi hoñol yap. To le bemp ndugi i ngéda w'a bii, to le gwel ndugi lini jam to lii. Hala nyen u yé bebe i ñôgôl kiñ malôga i Satan, iloo kiñ Nyambe. Jon u néyés ñem woñ letee u let kiki mbus Kul.

NJÉ.

Njé i yé nuga i nyai, igwéhék ki kôp matjél. I yé yimbne hiun, ôa, lôñha ñem, ni nyai, ni mintén mi mam mimpe ki hala mi mi nlébna i kété ñem mut. Jôga li ngéda, mintén mi bilem mini mi ñéga mut i kété manola. U yé le u heñ le u yémbél libak joñ libe, ndi u la ki yémbél jo, ndi to hala u nyaa ndigi we u nlôs kel yada kiki ngaa. Jon i ba ni le u nyi libak joñ libe, bat Yésu le a kobol we ni béba ñem ini. Hanano ni nwas hiun. [Bibôdle 45:5]. Tjél hiun, nwas ki nyai, u yodop ha bañ, hala a yé liboñok libe [Tjémbi 37:8].

I ñem u yé nyonok ni béba, u ngwés mapuna, ndi Nyambe nye: Mapuna ma yé mem, men m'a timbhe [Rôma 12:19]. Ngandak mimbomba mi bôt ba nyo maok, to ôt siba to "banga", le ndi ba bana ngui i pun bomete. Maok ba nyo ma yé mbôñ nyoo ni i péé [Ndimba mbén 32:33]. Yésu a bi kal le: Gwéha i bôt ba ñoo bé, ni gwés ki bôt bape kiki bé bomete. Nyambe a bi bôn le a nwéhél bés bibéba gwés ibale yak bés di nwéhél bôt ba mboñ bés béba.

NYOO.

Hégél ini i bé lam i kôba ni kwañ, i bi lôk Adam ni Eva nyo i wom Eden, le ndi ba ôbôs longe adna ba bé ba gwé ni Nyambe. Ndi mahoñol ma ma bi yon; ndi ma lona ndiue, nyoo ki i nimis bilama gwé. Ibôdôl ha yokel, ôa i jôp i pôla yé ni mut. Satan a yon ni njôñ i tehe a bé tehe gwéha Nyambe a ngwés bôt ba bisu a hek, ni lipém a bé ti bo, letee a ti bo ane i ngi nkoñ isi wonsô, i tel i Lusifer nu a yila Satan [Nsohop]. Ntén béba mbu njôñ u manola unu won u njôp ñem woñ,

ni i niñ yoñ. Wo ki won u nsôña we i ba masé, to laki bôt bape ba gwé nsañ ni masoda.

Yak bagwel nson Nyambe ba nlama yoñ yihe, ni yén péé le mbu mbe u njôñ unu u gwélél bañ bo i kolba baso bagwel nson bape, ba ba yé le Nyambe a yé le a gwélél to sayap bo iloo bomete mu nlélém nson. Njôñ i nha ngandak mahofiol mabe ikété ñem woñ, mama yé le ma ñôbôs masoda ma bôt bape, ni nol bôt u nkil njôñ. Njôñ i pôla nlôm ni nwaa i nla ôbôs ndap libii ni niñ yap. Njôñ i gwé béba ñem, i yé ki banaiga kiki soñ. [Tjémbi di Salômô 8:6].

NKONGO.

Nuga ini i nje gwom bi hisi; yon i yé yimbne mbéna-je, li gwés moni ni lingwañ, jon li yé lipigil li bibéba gwo bisôna. [Timôtêô Bisu 6:10] I loñ Kôngô, u nla tehe minkongo mi nje dison ni suluk letee mabum ma bôô bo, ni nwo mi wo. Mut a nhép ni nkus a nla bé sambal woo wé i hôla diyeyeba to bôt ba ngoo. A noode ni manjel momasô mabe ni malam le a kôhle ngandak nkus u nkoñ isi; to laki a nyi le lisuk manglét ni masek ba je wo, to le bôt ba wip ba nip wo. [Matêô 6:19-21]. Jon Yésu a mbéhe bés le di téédana nkus wés nyoo ngi i homa mut wip a nla bé pam le a nip wo. Inyule het nkus woñ u yéna ha nyen ñem woñ w'a ba. [Matêô 6:19-22]. Akan ni ndap yé ba nôla inyule a gwés gôl, ni silba, ni gwom bi nhee ngandak ndamba, hala nyen a yoñ gwom bi bi tiihana. [Yôsua 7]. Yuda Iskarôt, nnigil Yésu, a nitba, ndik inyule a ba gwés moni; inyule ligwés moni li yilha nye mut nliba bisu bi Nwet wé, ni malét wé [Matêô 27:3-5]. Ha moni ni gôl bé gwon bi yé béba, ndik ligwés nkus li li sôli i kété ñem mut. Dikôô ni dikôô di bôlôm ni bôda, ni ba ba gwé mintén mi bitel nwo-minsôna, i kété matén momasôna, ba ntjé niñ yap bo mete, ni i bôt bape, i kété ngôñ be ba gwé i hoo bana moni ngélé yada, jon ba ntine bomete ikété mintén ni mintén mi mintuk mi mi nti bé bo bot-ñem i hoo bana, ndi to hoo kôs, ikété jam kiki bo "Jambô"; bo pémsan bibaskô, bo mintuk mi bol. ni mimpe. Ngôñ i hoo bana moni ibabé i nok to kôs ngandak ndutu, i ñéga manola. Di nlama yi jam lini le hébék ni li gwés nkus gwo biba bi nkiha lôñ. Yésu a nkal le: Ni yihge, ni tadak ki bé bomete inyu hibañla hinan hiosôna, inyule nom i tane bé inyu ngandak gwom mut a gwé [Lukas 12:15]. Hala a nhôla ki mut ibale a yé le a bana nkoñ isi wonsôna, ndi a nimis mbu wé? [Markô 8:36]. Bo ngi-hémle bon ba nyéñ i gwom bini gwo bisôna [Matêô 6:24-34].

SATAN.

Satan a yé isañ bôt ba bitembe, ni malét bôt ba malôga. Nyen a yé kiñe bibéba gwo bisôna, ni ñane miñem. Yésu a nkal le: Isoñ nan le Nsohop, jon ni ngwés ki yônôs bisômblene gwé. Nyen a yé mut manola ibôdôl yaga bibée, to maliga ki ma nlépna bé i kété yé, inyule to nyemete a ta bé mut maliga. Ngéda a mpot bitembe, wee a ngwel nson wé womete, inyule a yé mut bitembe ni isañ bôt ba bitembe. [Yôhanes 8:44]. Nhémle Nyambe a nlama bé tembe. Ibale di nkal le di gwé adna ni Nyambe ndi di hiumlak jiibe, wee di nlôk bés bonéte, tomaliga ki ma ta bé i kété yés [Yôhanes bisu 1:6]. Pama nyoo i tan a ngwo, ni bagwel makañ, ni bôt ba ndénk, ni ba manola, ni ba bégés bisat ni hi mut a ngwés bitembe a gwelek ki gwo. [Masoola 22:15].

HIÔDÔT.

Hiôdôt hi yé yimbne i man kiñ i kété ñem u hi ki mut. Hana i titii ini, i man kiñ ñem nunu a nhénd, nyonok ni béba, ni bitem bibe, i nya i yé le a nla ha bé gwel nson wé kiki a langa gwel wo. Inyule a mal kwo ndim, a bak ki nyômôk i nya i yé le a nla ha bé ki to kées maboñok mé ma mam nyc mete [Lôk Héber 10:22].

JIS.

Jis li Nyambe li yé homa nyensô, li ntehe kii yosô i yé ñem mut. To jam li nla bé solop jis li Nyambe li li nloñ kiki lindômbô li hié. Ndi Nye a nyi, ni tehe mahoñol ni bisômblene bi sôli bi ñem u hi ki mut. To u mbôñôl yaa mam moñ mabe ngembe ñem-uu, to ñem lipan, to isi malép ma tuye, to he yaga, Nyambe a ntehe mo.

BON BA DILÉMP DI HIÉ.

Bon ba dilémp di hié ba ba nkéña ñem u mboñ-béba, ba yé yimbne i gwéha Nyambe. Iyé maliga le Nyambe a ñoo béba, jon a ñoo nyemb béba mut. Ndi sômbôl Nyambe i yé le: Hi mut a tam béba yé, ahicl ñem, ndi a kôs niñ boga. Yésu a bi lo le a tohol baboñ béba. Masé makeñi mon ma yé ma ba nyoo ngi inyu béba mut yada i i nhicl ñem. Nyambe a yé bebe i pubus ñem u hi ki mut i kété matjél ma Pombe yé Man le Yésu-Kristô, Nye ki nyen a yé yimbne dilémb di hié ini. Gwéha Nyambe i ngwés jôp mu ñem u u mal sune, ni wo i kété béba, le i tohol wo.

ANGEL.

Angel i yé yimbne i Banga Nyambe. Nyambe a nkwélés mboñ-béba nu a bi yumhana ni malôga ma Satan. Nyambe a nkal nye le a tam béba yé, a nwas le mapupi ma Nyambe ma jôp i ñem wé u u yé ikété jiibe. Jon Nyambe a nkwélés yak we nu u ñañ kaat ini.

HIBENË.

Hinuni hi mapupi hini ni hi suhul nyu, hi yé yimbne i Mbu-Mpupi, Mbu maliga u u nyoyoi béba, ni ngi telepsép, ni nkaa. Munu i titii ini, Mbu-Mpupi a yé i tan, inyule a nyén bé i homa béba yon i ñénél.


Ibale i titii i ñem ini i ñunda libak li ñem woñ womete, i nsômba ndigi le u lôndôl Yésu. Yible Nye ñem woñ, u nwas ki le mapupi ma banga yé ma jôp i kété yoñ. Hémlé Yésu Kristô ndi w'a tohla. Nyambe a ngwés yônôs makak mé jon a bi bôn ki le: A héñha ñem woñ, ni ti we ñem yondo, ni mbu yondo. Titii i nyônôs ba, i ga tibil unda we jam lini.

TITII I BA

Titii ini i ñunda mut nu a mbôdôl tam béba yé, ni i yéñ Nyambe. Angel i gwé pa-nsoñ le Banga Nyambe, i i yé yômi ni ngui, i nhoo iloo pa malo ma, i njôp letee i bagal ñem ni mbu, mônğa ni poños bihés, i nwan mahoñol ni bisômba bi ñem [Lôk Héber 4:12]. Banga Nyambe i hoñlaha bés le nsaa béba u yé nyemb. Ni le: i yé ntéébaga le hi mut a wo ngélé yada, ndi mbus nyemb nkaa [Lôk Héber 9:27]. Lisuk li béba mut, nu a ntop bé hémlé, li yé ndik le a léña i titimba i nloñ ni hié ni solfa. Unu woo u mpe, angel i gwé kégécé-ño mut, kégécé-ño i nwok mut; hala a nlama hoñlaha mboñ béba le bôt bobasô ba nlama wo. Nyu yés i di nlôôha gwés, i i yé le di nlébel ngandak nkus i enk yo, ni jés yo, ni tôn yo ni yônôs bisômba ni minheña nwé, nyu i y'a wo, i bol ki. Minsoñ nwa je yo, ndi mbu wés ni ñem wés bi nlama telep bikéhene bi Nyambe. Mboñ béba a nlama sédi ôô wé hanano i emble mabéhna, ni i yible gwéha i Nyambe ñem. Mbu Mpupi a mbôdôl béiyés kété ñem u yôni ni jiibe. Mapupi ma Nyambe ma nene, jiibe li béba li mbôdôl ke ngwé. Ha i homa nu mapupi ma nene, jiibe li yé ñénlak i nyodi. Mbiibe i gwéha Nyambe i mbôdôl ligis ñem nsuni. Béba i i yé yimbne i nya ni nya mintén ni mintén mi binuga mini, i nlama ke ngwé inyu ngui mapupi ma Nyambe.

Yoo! a we mboñ mam mabe, nwas Yésu nu a yé mapupi ma nkoñ isi, le a jôp i kété ñem woñ. Hala nyen jiibe ni minson

mi jiibe ba nyodi mu ñem woñ kiki u ntehe hana i titii ini. Yésu a nkal le: “Men me yé mapupi ma nkoñ isi, mut a noñ me a hiumul ha bé jiibe [Yôhanes 8:12]. Mbombe ni ba ba



ÑEM U BÉBA, NGÉDA U NYÉÑ TOHI

ngwés jiibe iloo mapupi. Ngéda Yésu a jubul i témpel Yéru-salem, a luhul bôt ba ba nuñul nyaka, kembe, ni dibeñ, a bôs bitéblé bi bahéñha moni, a kal le: Ndap yem i yé ndap masoohe, ndi bé ni nyilha yo hôk bôt ba wip [Yôhanes 2:13-17].

Ndap i, i yé ñem woñ. Yésu a lo, ha inyu nwéhél bibéba gwotama bé, ndi a lo ki i kobol bés isi ngui, ni éné! Satan.” Ibale Man Nyambe a nkobol bé, ki n’a vila toi ngwélés. [Yôhanes 8:36].

TITII AA



ÑEM U U NHIELBA

Hana di ntehe titii i ñem u mboñ béba nu a mal hielba toi ni maliga i pes Nyambe. A nôgda ni yi kiki bibéba gwé bi yé bikeñi, bi wéhga ki nyu, bi lôôhaga ki bôl, gwon Yésu a bi nwéhél i ngi mbassa. Ngéda a mbéngé mbassa, angel, i i yé

banga Nyambe, i nsoolene nye mahôha mé, ha nyen ñem u nkônde siida nye. Gwéha Nyambe i i yé i Kristô-Yésu, i ntômbôs ñem wé longe longe, ngéda a mbigda le, Yésu-Kristô, Man Nyambe, a bi lo héa bibéba gwobisôna, ndi a neebe ki wo ño wé. Nem u mut a ntam toi, u nlôôha siida inyu ndôm Yésu a biba, ni ntut biloo, ni batone ba tômôl moo ni makô mé, ni ki a tômlana i mbassa inyu bibéba gwés.

Ngéda a ñañ ni emble Banga Nyambe, a ntehe nyemete i léman Nyambe, ni léba lela ñem wé u nhénd ni nyonok ni béba. Jam li li ñôm nye ñem, a nyodop ni ee inyu béba yé. Nyambe a mbôdôl kôôge nye bebe. Gwéha Nyambe ni nsañ wé bi njôp ñem u u yé le matjél ma Yésu ma mpubus ni béba yosô. [Yôhanes bisu 1:7]. Ha ni nyen a mbôdôl toi yi le Nyambe a yé bebe ni ba ba gwé miñem minsôhga ni mi mi nyodop. [Tjémbi 34:18-19]. A mélés ki bo ni kañ bikwé gwap [Tjémbi 147:3]. Banga Nyambe i nkônde kal la: “Ndik mut a gwé ñem u nyodop ni nu a nsehla bisu bi Banga yem nyen me nun [Yésaya 66:2].

Mbu-Mpupi ni Gwéha Nyambe ba yé bebe i yoñ ñem wé ngim, lakii u mal pubhana. Ngéda mut a nhémle ni béngemu i mbassa Yésu matjél mé ma a kôp inyu nwéhél bibéba gwés, a mbôdôl tehe le bibéba gwé bi nwéhlana, ha nyen a mbot ñem le matjél ma Yésu Man Nyambe ma bi pubus nye ni béba yosô. [Yôhanes bisu 1:7-8]. Nu a nhémle Yésu a wo ha bé, ndi a gwé niñ boga [Korintô Bisu 6:10-11]. Ni Yésu nyen di gwéne nwéhél bibéba gwés, inyu matjél mé, kiki ngéda lingwan li Karis yé. [Efésô 1:7]. Hanano, mbu yondo u yé ñem wé, i bôdôl i ngéda a ngwés ha bé nkoñ isi, to mam ma yé nkoñ isi, ndi a nyéñ ndigi mam ma Nyambe nu a nyônôs ñem wé ni gwéha yé. Binuga bi bi yé yimbne béba bi mal pam mu ñem wé; ndi to hala Satan a yé ngi ke, a ngi nun bisu ni bot-ñem le a léba njel i tiimba jôp i kété ye. Jon i nkéla bés le di yén pé ni masoohe, le ndi di la kolba Satan, ndi a ke bés ngwé.

TITII I NA

Titii ini i ñunda nhémle nu a nkôs banga nsañ, ni biyé-blene inyu sesema i Nwet, ni Ntohol wés Yésu-Kristô. Jon a nla bé yadbene i jam lipe ndik i mbassa Yésu-Kristô; inyu yé nyen nkoñ isi u mal tômlana i mbassa i pes yé, yak nye i pes i nkoñ isi. [Galatia 6:14]. A nléba toi le Yésu a wo i ngi mbassa le ndi yak bés di wo i pes nkoñ isi, ni pes béba; ni niñil inyu telepsép. [Pétrô Bisu 2:24]. Banga nhémle a mal tômla mbassa

i pes nkoñ isi. Kaat Nyambe i ñane bés i hiumul isi ane Mbu le ndi d'a hiumul ha bé isi minheña mi minsôn. [Galatia 5:12-

Ntômlaga mba-
ssa lôñ yada ni
Nye. Galatia 2:
20. Nwoga i pes
béba ndi yômi i
pes Nyambe, i
Kristô - Yésu
Nwet wés. Rôm.
6:11.

Ndi inyu yem
mêmete, me ta
bé me le me ya-
dbene inyu jan
lipe, ndik inyu
mbassa Nwet
wés Yésu - Kri-
stô. Galatia 6:14.



NTÔMLAGA NI KRISTÔ I MBASSA.

25]. I nkéla ki bés le di yéñ pubha, ibabé yo mut nye ki nye a tehe bé Nwet [Lôk Héber 12:14].

Mu ñem kété u titii ini, u nla tehe mbassa homa ba bi tòmól Yésu batone ngéda ba bi mal héa mbot yé. U nlama ki tehe disôd ni bikék ba bé bibil nye ni njôd yosôna. Inyule i njiiha i bé lama kwél bés yon i kwél nye [Yésaya 53:5-6]. A bi téngana inyu bibéba gwés. Kiñe Hérôdé ni bôt bé ba bi jôha Nye; ki ba mal bép nye, ba ha nye mbot kôibaga ni ntut biloo i ño wé kiki hikôdô, ndi ki yom ba bé lama ha nye ntut gól. Ba bi gwélha nye ntongo likai i woo wé walôm, ndi ki yom ba bé lama ti nye; jai li kiñe. Ba ôm maboñ bisu gwé, ba jôha nye, ba kal le: Di nyéga we a Kiñe Lôk Yuda. Ba tjôle nye matai, ba yoñ ntongo likai ba ti nye, ba témb ki ba bép nye wo ño. Ba mal bañ jôha nye hala, ba kena nye le ba tòmól nye i mbassa. Ngandak bahémle ba mól ba yé, ba nsooh mandap ma mitin, ba nyoñ Je-Tata, ba tublag Nyambe tjémbi, ndi bibôñól gwap bi nkônde tòmól nye i mbassa yondo yondo. Ha hi mut bé nu a nsébel me le a Nwet, a Nwet, nyen a jôp i ane ngi, ndik nu a mboñ sômbôli Tata nu a bi om me [Matéó 7:21-27]. U ntehe mu nlélém tiui bot i Yuda a bé téédana moni; Yuda a liibana Yésu, a nuñul nye inyu môm maa ma bipes bi silba, inyule ligwés moni li bi yoña ñem wé, li kôp ki jiibe mu kété mbu wé. Bilambe ni minsañ mi bikei gwon sônda i gwélél ngéda ba gwel Yésu ni kena nye juu. Mbañ yon i hôla bo i kabna mbot yé; le ndi bi banga bi bindéé inyu Yésu bi yon le: “Ba bi kabna bienk gwem, ba leña ki mbot yem jambô [Tjémbi 22:18]. Ba yoñ bañ Yésu gwom gwo-bisôna, ba tjôd nye, ba kal le: Di ngwés bé le mut nunu a énel bés.

Bôt ba ngwés le ba bana bisai bi Nyambe gwobisôna, nop ni hianga, ndi ba ngwés bé suhul bomete to ha bomete i kété hikéñ hi Nyambe. Jon ngandak i nyil ndiki Nyambe i ngéda ndutu, ni ngéda bot-ñem i mal bo.

Sônda i ôm Nye likoñ i hieñ, malép ni matjél bi pam [Yôhanes 19:33-37]. Ilo le kôp i ñoñ, ki Pétrô a ma tañ Yésu bisu bi mbôñól nu muda; ndi mbus a yik tam banga litamak ni gwiiha mis. Ba yak we u mpahal Yésu lipôdól ni bibôñól gwoñ? To le u nwo yaa nyu bisu bi bôt? Yésu a nkal le: “To nje a ntañba me bisu bi bôt, yak me m’a tañba nye bisu bi Tata wem nu a yé ngi [Matéó 10:32-33]. Yésu a nkal ki le: “Ibale mut a ngwés noñ me, a yôiba, a bege mbassa yé, ndi a odop me mbus. [Matéó 16:24]. Ni le: “To nje a mbege bé

mbassa yé, le ndi a noñ me mbusa a kôli bé ni me [Matéô 10:28].
Masoda ni ba ba tééne ngi liaa le “Yésu—Kristô”.

Liaa li boga ni boga
Li li bôône inyu yem,
Me ngwés solbene i kété yoñ,
Le malép ni matjél
Ma ma kulne mu ntôbôk woñ hieñ
Ma soo béba yem.
Pubus me ni wo-nyu i béba, ni ngui béba.

TITII I TAN


Titii i tan i ñunda bés niñ pubha ni i mapupi, i mboñ béba nu a mal tohlana inyu karis i nlôôha ni konango Nyambe. Nem u mboñ béba nu a mal tohlana, a pubhana, u mal témb banga témpel ni liyéne li Nyambe Tata ni Man ni Mbu-Mpupi, ki ngéda likak li Yésu-Kristô le: “Ibale mut a ngwés me, a tééda banga yem, Tata ki a gwés nye, d’a lo di yén ni nye [Yôhanes 14:23]. Nyambe a mbédés ni sayap mut ndik inyu Yésu-Kristô [Lukas 1:52]. Nem unu u ntémp témpel Nyambe nu niñ hanano. Béba i mal nyodi. Hanano, Mbu-Mpupi a mal yoñ yéne munu ñem unu, homa mintén ni mintén mi binuga mi undga béba mi bak, ni Satan isañ bitembe. Nem unu u nla ha bé num minson mi mbe mi minsôn, u nyila yaa longe wom binene, i homa longe ee i num ya matam ma Mbu kiki bo: Gwéha, masé, nsañ, wongut, ndéñbe, liyômba, longe ñem, ñem hémlé, lima ni hôt-nyu, ni hi litam lipe li li nlémél Nyambe ni bôt. Hanano ñem unu u ntémb ntjep u tén-nkô le Nwet wés Yésu-Kristô. Jam li lisôli li li num matam i kété yé li yé le: “a yé i kété Yésu-Kristô, yak Kristô i kété yé [Yôhanes 15:1-10]. Jon hala ki a yé nsôblaga ni Mbu-Mpupi, nyonok ni ngui yé, a nla yémbél ni énéli minsôn ni minheña nwé ni bisômblene gwé; ndi a tômôl ki nlômbi-mut i mbassa. Ni ngui Mbu-Mpupi nyen a nla hiôm kingéda mbu; a niñil ha bé kingéda mam a ntehe to ma a nok, to nôgda, ndi a niñil i hémlé. Inyule hémlé di nhémlé Yésu-Kristô yon i yé yémblene i i nkomol nkoñ isi. A niñil ikété bot-ñem i yôni ni ngui yon i nléthana ni bot-ñem i yôni i malôl ma lipém ma Yésu-Kristô ma ma nyégi A niñil inyu, ni i kété gwéha Nyambe i i nom i boga ni boga.

Masoda ni bôt ba gwé miñem mi mpumpi, inyule ba tehe Nyambe [Matéô 5:8]. Kiñe David, to laki a ba a gwé nkus ngandak, to laki a yémbél ñoo nu a nene ni mis, to laki a pam i nol mpémba mut le Gôliat, ni bape ki, a bé nôgda i kété ñem

wé le i nyiñba nye ngim banga jam i a bé lama bana le ndi a la tehe Nyambe. Jon a bi lôndól nyoo matihil mé ma ñem le: “A Nyambe, hek ñem mpupi i kété yem, u timba ki ti

Gwéha
Masé
Nsañ
Wongut
Longe ñem.

Liyômba
Nem hémle
Lima
Hôtnyu.
Galatia 5:22.



TÉMPEL NYAMBE

me mbu u yé sêp i kété yem [Tjémbi 51:10]. Mut nye ki nye a ta bé le a pubus ñem wé, ndi to hek ñem mpupi i kété yé nyemete. Hi mut a nlama lo yak Nyambe ni banga “hiel-ñem”,

a pahal bibéba gwé ni tjél gwo kiki kiñe David a bi boñ; ntlém kiki man nimlaga nu a yék i tat ngôï, ndi a témb yak isañ kiki a ba, a kalak ni ñem u nyodop le: “A Ta me nhuhul ngi ni wemete”. Nyambe a ngwés boñ i jam li yondo lini i kété yoñ, Ha inyu telepsép yés bés bomete bé nyen di nla tibil miñem nwés le mi yila liyéne li kôli inyu Nyambe. Ndi Nyambe a yé bebe i hôla hi ki mbon-béba nu a nlo nyeni ni banga hiel-ñem. Inyule Nyambe nyemete nyen a mboñ le a kôp malép mapupi i ngi nan, ndi n'a pubhana. M'a pubus bé ni nyega nan yosôna ni bisat binan. M'a ti be ñem yondo, m'a ha ki mbu yondo i kété nan, m'a héa ñem ngôk, ni ñem ngok mu manyu manan, ndi m'a ti bé ñem minsôn. M'a ha Mbu wem i kété nan, ndi me bôñ ki le ni hiumul mambén mem [Ezékïel 36:25-27]. Hala nyen a yé malômba ma yondo Nyambe a bi bôn, ndi a om ki mo sitamp i matjél ma Man wé Yésu-Kristô.

Munu i titii ini di ntehe angel i nkônde nene. Angel yon i yé mimbu mi ngwélél Nyambe nson, yon a ñom i gwélél nye ngim mam yak bakôdôl niñ boga. Yo ki yon i nkéña ba ba nkon Nwet woñi. [Lôk Héber 1:14]. Tjémbi 34:8 ni 91:11-12; Daniel 6:22; Matéô 2:13 ni 18:10; Minson mi Baôma 5:19 ni 12:7-10]. Munu i titii ini di ntehe ki Satan a té bebe ni ñem, a nlôbhe njel i timba jôp i nlômbi wé liyéne. Jon i nkéla bés le: “Di yén péé, di soohege, inyule nkolba wés le Satan, nu a yé kiki mbondo-njé le i mbam, a nhônd i pañ yés, a yéñég mut nu a nla milba. [Pétrô Bisu 5:8]. Jôga li ngéda a nhéñha le a yé angel mapupi, a yumhag bahémle ba ba nyén bé péé ni minheña mi nkoñ isi, ka i yé le a nla ki pam i lôk yak banga mintebek i hogi. Ndi ibale di nkolba Satan ni hémle ni masohe, a ke bés ngwé [Yakôbô 4:7].

TITII I SAMAL

Titii ini i ñunda béba libak li nhémle nu a ntémb ni mbus. Jis jé jada li mbôdôl lém, hala a ñunda le nhémle nu a nkahal sune, ni ke hilo, a mbida ha bé ni niñ yé i mbu. Lini jis lipe, to jo li nwo ha bé nyu i yéñ ini pes ni ini, le li yoñ ngaba ni niñ nkoñ isi. Mapupi ma ñem wé ma mbôdôl hoi, yak biyimbne bi bi mbéna unda le ñem u nsôghe inyu Kristô bi mpala lém ngwé ni ngwé, to nene bi nene ha bé longe. Mut nunu a yé i kété manoodana ma ma nyémbél nye ndék ni ndék, laki a nla ha bé kolba Satan nnoode bôt. A ngwés emble kiñ Satan iloo kiñ Nyambe. To hala, kii a ngi lok makoda ma mitin, a heñek ki i sôd libak li niñ nkoñ isi li li ntimba jôp ñem wé, mut nu a nkahal ke nonok ni Nyambe, yak gwéha bisu a bé

gwés Nyambe i nhoi. Hiôdôt hi hi yé man kiñ ñem wé hi nsômbôl lém, yak mbassa i nyilna nye soso mbege i a nihbe ha bé bege. Hémlé i mut nunu i nkahal ndeñk, a nla ha bé ki to bana adna ni Nyambe masoohe. A ntôñ ha bé ki to ni



ÑEM UU NOODANA U KABNA KI

libak li ñem wé, a néhne ki nnoode bôt pôla, nu a nthing nye ni nyu i pañ yé.

Mbu-mbe u hinuni le Kundi u u yé yimbne ngôk, u nkahal yéñ njel i timba jôp; mut nunu a nyon ni ngôk, yak hôya a

nhôya le a bi tohlana ni Karis yotama. Lihua li maok li mbôdôl koode nye nwemel hanano, li mbôdôl yéñ njel i jôp. Mut a yé le a yilna nye Satan ni kal nye le a nyo ndik tômbilô yada, a nla ki ke bisu ni lôk nye le; mana maok ma gwé bé ngui, ma ta bé béba. A mbanga bé yi le i nyo ndék, to i nyo maok ma gwé bé ngui banga kiki bie, hala a njubus yaa mut i lom lihuua. To le ngéda muda a nti nlôm ni mawanda mé biere, a mbat nwéhél le nyemete a nyo bé, ndi a nwas ni tinde bape le mbu-mbe u lihuua u lôk bo. Mimbok ni ndénk gwok bi nlo mbus ngéda i noode nhémle ni dipa tjap di beehié. Hanano a mbôdôl bana ngôñ i emble minkwel mi bo-ngiyi, a mbôdôl ki gwés bilôñ bi mpungu, ni telep biti bi tjémbi ni bi malok ma nkoñ isi; bep yaga, mut nyen a nkal nye le lilok li bahémle, to le, lisagak li bahémle bo ni bo li ta bé béba; inyule hala a yé lem bôt bobasô, ni le i boñ béba ngélé yada hala a ta bé béba, inyule bôlôm ni bôda ba nsak ka yada ndi li sak kiki bo-ngiyi jon li yé libe. Ndi a hôya le, hi homa ti lilok i yé, mam mabe ma yôni ndik ha, ni le lilok li nhémle li nlôdha béba iloo li ngi-hémle. Yak liôdôk li siba ni banga li bahémle li nlôdha nene béba iloo li bo ngi-yi Nyambe. Inyule nyu i nhémle i yé témpel Nyambe, to le i Mbu-Mpupi [Korintô Bisu 3:16 ni 6-19]. Jon di nlama bé hindis i témpel i ni mbu siba u u gwé mbôñ be. Yésu nyemete a ôt bé siba, jon to nhémle nu a noñ nye a nlama bé ôt.

Satan a nke bisu i ti mut nu maéba le: I tugus béba hala a ta bé béba; nile: i boñ béba ngélé yada to i boñ jam libe jada, hala a ta bé béba. Hala nyen nnoode bôt a nlôga letee mbu-mbe u mahindi ni u ngi-yi u kôs kunde i jôp mu ñem u, u u yé le u bi pubhana, ndi a kônde ki ane wo. Hana i titii ini di ntehe mut a ñôm hikéñ mu ñem; a yé yimbne bôt ba njôha hémle i Lôk-Kristô ni kolba yo; bon ba nkek miñen mi bahémle Nyambe ni bipôdôl bibe kiki bo; nliba, minsohi, liôbôs jôl, ni minjôha . . . lkb. “Mut nu a ntañba hémle a nla ha bé nihbe minjôha, to diyana di bôt, longe longe ngéda bôt ba ba yé mawanda mé. Bibanga bini bi ñôm nye ñem, ibôdôl ngéda gwéha Nyambe i bi hoi i kété ñem wé, ha nyen a bi bôdôl kon bôt woñi iloo Nyambe. Inyu woñi a nkon bipôdôl bi bôt ni bibôñlôl gwap, jon a nyila nkol wap, a témp ki ni mbus.

Hiun ni likañ su ba ntimba nene ngéda ndutu, bi nyéñ ki i ane ñem. Ha i ngéda ki i nyen bisol ni mahuu bi nhindis bibép bi nyo bi bi yé le bi béghak Nyambe ni soohe nye.

Ibale Satan a nla léba to himaga hi póla li jubul to man nwe-mel, ki hida hi ga jôp, hi kéñbaha lijubul le ndi mi-mbu mi mbe mipe mi la jôp.

Hala a ta bé nledek jam le ligwés moni li jôp i kété ñem wés, ibale u nyoñ bé yihe ni mabéhna ma Nwet wés Yésu-Kristô nu a nkal le: “Yéna pé soohana Nyambe le ni kwo bañ i kété manoodana” [Matéô 26:41]. Jon nu a nñoñol le a té a yoñ yihe a tiga le a kwo [Korintô bisu 10:12]. I nsômba ni bés le di engép bijôl bi gwét bi Nyambe gwobisôna, le ndi di la kolba nsohop ngéda manoodana. [Añ Efésô 6:11-18].

TITII I SAMBOK

Titii ini i ñunda bés ñem u nhémle nu a mal kwo. Mut nu a mal kôs mapupi banga likôhók, a kôs ki likébla li Nyambe, a kôs ki ngaba i Mbu-Mpupi, ndi a yiga tañba hémle yé, a témb nkoñ isi. Titii ini i ñunda ki bés libak li mut a nyégi i hiel-ñem, to le a nyégi i sem nyemete yak Nyambe ngim; to laki a ntjél nógól miñañ minlam mi mi bi soolana nye. Mut nu, a nlédés ñem wé ngéda Nyambe a ntiige nye bebe, a nkida i kété béba yé, to laki a nyéñ i tibil niñ yé bisu bi bôt.

Yésu nyemete a ntibil toñle bés libak li nya mut ini i kaat Lukas 11:24-26. Ngéda mbu-nyega u nyodi i kété mut, u nhiôm bahoma banumnga i yéñ noi, ndi u ntehe bañ bé yo, u nkal le. me ntémp ndap yem homa me nlól. Ngéda u nlo, u koba yo nsahak ni ntiblak; ndi to le u nke, nyoñ mimbu mimbe mimpe mi sambok mi mi nloo nwo mete béba, ni nwo mi jôp, mi yén mu; ndi libak li nsók li mut nu li nyila libe iloo li bisu [Pétrô Ba 2:22]. I nkéla ni ntén mut unu kiki ngén i nkal le: Ngwo i ntémp i je bilôô gwé, ni le: ñin ngôï u mal nogop u nke ki i béñba liboo. Bipes bi kaat bini bi ntibil unda bés libak li ñem mut nu a bi hérale ndi a yiga kwo, to le mboñ-béba wada nu a ngwés bé hiel ñem wé. Mbu-Mpupi, yimbne “hibeñ” a yé ñénlak i nyodi mu ñem u, inyule ñem wada u nla bé ba Témpele Nyambe ni liyéne li Satan. Angel, Banga Nyambe i nke ni hiun, i nunuk ki mbus, i hoñlak le too mut nu a yé le a yiga hiel-ñem kiki man-nimlaga [Lukas 15:16-18]. Ngôñ i ba gwel nye ngandak i je matam ngôï i ba je, ndi mut nye ki nye a ti bé nye mo. Ndi mahoñol ma lôl bañ nye, a kal le: Babôñôl ba Tata bañen ba gwé koga i kôli, ba nje i yéglege ndi me me wok njal hana? Ma nyodi, me hu yem yak Tata, me kal nye le: A Ta, me bi boñ ngi ni mis moñ béba,

me kôli ha bé me ba sébla man woñ. Isañ a tehe bañ le, man a nhiel-ñiem, a nwéhél nye, a yôge nye i kété lingwañ jé.

Ndi, i kété titii yés ini, di ntehe bé banga hiel-ñiem i i nla hôla i mut nunu, a bi tibil bé hielba banga i pes Nyambe, a yéñ bé ki to nwéhél bibéba makô ma Yésu. Kiñ ñiem yé i bi



ÑEM U U MAL NAI U TÊMP KI NI MBUS.


wo kiki yom le i nlighana ni kei i nloñ Mut nunu a gwé maô, ndi a nok bé kiñ minyemhe i Yésu i nsébél nye. A gwé mis, ndi a ntehe bé bee-hié i i yé nyibлага isi makô mé. A gwé bé ngôô, ndi to wonyu i boñ béba i mbamba. Satan nyen a ñéné!

ñem wé, a yiine mu kiki kaisa i yine i kônda yé ane. Bitéé bi mis a nene banga mut Nyambe, nyonok ni lipém ndi ki a yé ya kiki soñ i nhôa pem, kété yé i nyon ni bihés bi bôt ni nyega yosôna. [Matéô 23:27]. Isañ bitembe a mal yoñ tel mbu-maliga hanano. Hi ki nuga, hi ki béba, igwéwéwé mbu-mbe ni u nyega i hôla Satan i tibil énéñ ñem wé. To hala kiki a ngwés le a tohla ni babôñôñ babe bana, ba ngi gwé nyé nkañak ni nsañ bikei. Mut nye ki nye nu a yan mbén Môsé a wo ndigi isi mbôgi bôt ba to baa i ba bé ngoo. Ba ni nhoñol bé kinje nôgôs i nlôôha Nyambe a pémhene mut mbagi le a nlama kôs, nu a bi kitbe Man Nyambe ni makô, a tehe ki matjél ma malô-mbla ma ma bi pubus nye kayada kiki matjél mape, ndi a yuyi ki mbu u Karis? [Lôk Héber 10:26-29; Pétrô Ba 2:1-14]. Ibale i titii ini i nkola ni libak li ñem woñ a ngwa yem, lôndôñ Nyambe ni ñem woñ wonsôna. A nla ni gwés nwéhél béba yoñ yosôna, ibale u nlo nyeni ni banga mahôñol inyu hiel ñem woñ. Lo nyeni, kiki nkon lô nu a lo nyeni a kal nye le: Ibale u nkémhe, u yé le u pubus me. Yésu a timbhe le: Me nkémhe, pôp [Markô 1:40-41]. Ndi ibale u nkônde lédés ñem woñ, u gwéhék ki jiibe iloo mapupi, wee yi le, bot-ñem yo ki yo i ta ha bé inyu yoñ, ndi to mahôla mo ki mo, laki u ntep nyemp iloo niñ. Inyule nsaa béba u yé nyemp [Rôma 6:23].

TITII I JUEM

Hana di ntehe nyemp i ntiige bebe ni mut nu a bi tañba hémlé yé, ni mboñ-béba nu a bi tjél hiel-ñem wé, a kida ndigi i ti makak mo ni mo le: Yani, to le nooma nyen me ga hiel ñem, ndi a nyaa ndik nyemp yon i mak nye moo. Nyu mintén mi bôt mini i yé nyonok ni makon, mbu wap ki nyonok ni woñ nyemp. [Yinda nyemp i mpuhe nye]. Masé ma béba ma ma nlôga ma mal yuyi hanano a mboma toi soso ndutu i saa béba yé. Njiha bee-hié i nyoñ nye, ka yé le, a nla ha bé nôgla ni Nyambe inyu bikuu bi nkwél nye. To laki a gwé ngôñ i soohe hanano, a nléba ni le a nla ha bé bana adna ni Nyambe nu a bi lôôha yan ni tañba hana isi ntel niñ yé yosô. Minlômbi mé mi mawanda mi nkon woñi i tiige nye bebe i homa a niñne; gwanga gwap bi bibuk bi gwéne ha bé nye mahôla to nseñ wo ki wo. Lingwañ jé li ngi-telep-sép li nla bé ébés dilo di niñ yé, to i tohol mbu wé, to hôgbaha njôghe yé. Satan a nkéña nye ka yé le nyemete a ntehe le njel yo ki yo i ta ha bé i ti niñ yé nyemete yak Nyambe. Mam a gwéhak ngéda a bak a ngi gwéne niñ, ni ma a niñlak, ma mbôdôñ keñgle nye hahano, to nkônôs wé nu ngi hiel-ñem a yé nye nonok ni

ngi-manôgla, ka yé le a nla ha bé ti nye mahôla ha i ngéda i. Hanano ni nyen a ntibil yi ni maliga le, i yé jam li nkônha wofii i kwo i moo ma Nyambe nu niñ [Lôk-Héber 10:31].



LISUK LI MBOÑ-BÉBA

A bé béna hoñiol le bo Nyambe ba yé le ba pala sangla, bebek to i ngéda nyemp yé, ndi hanano a nléba le ngéda i mal tagbe. Didun ni dikôô di bôt nyemp i mpuhe bo ka yé le ba nla

ha bé bana ngéda i yéñ Nyambe ngéda insók. Jon i yé ne mut nseñ i yéñ. Nyambe ngéda a nla lébna .Munu i titii yés ini, mboñ-béba nunu a nwo ngéda a mal tjél konango ni gwéha Nyambe ntel niñ yé yosóna, a top bé nógól bibanga bi Nyambe bi bi bélama lédés ni tohol nye. Kiñ i mpôdôs nye hanano, i ta ha bé i Ntohol wé ndi i yé i Nkéés wé, i nkal nye le: “Nyodnana me mbom, a bé ba ni ntiihana, kenana i hié hi boga, hi hi nkôôbana inyu nsohop ni angel yé [Matéô 25:41].

Kiki i yé ntilbaga le: Bôt b'a wo liwona jada, i mbus hala mbagi [Lôk-Héber 9:27].

TITII BÔÔ

Titii ini i ñunda libak li banga nhémle nu a njo sañ i yémbél hié hi ngandak manoodana. A noodana manjel momasóna, a mpingla bé, a nhônba mam momasóna i pam lisuk, laki a gwéne yémbél i jôl li Yésu Kristô. A mbel ndigi Yésu mis nu a yé mbôgna nlôñ ni nyônôs hémlé yés. [Lôk-Héber 12:1-2]. A mpala lep yida mbege, ni béba i i hôk nye, a ligbak ni ngwé i hônba i kété njel nson i i nyiblana nye. Satan ni ntôñ wé gwét wonsô ba nkéña ñem wé, ba noode i timbis man Nyambe ni mbus, i héa nye i kété njel telep-sép i a mal léba. Ngôk, li gwés moni, mambu mi nyega, ni dikoba dipe ndôñ ni ndôñ, bi yé ha, bi nkoode le bi jôp. Jagas li nyoñ yéne i njé, inyule jôga li ngéda, béba i nla sôô libak jé i la ki solop i kété longe jam yada, to le i yoñba jôl lipe le ndi i unda bañ yo mete le i yé béba. Ndi to hala banga nhémle a yé péé i léba béba, to i ba ya le i sôli i biniigana bi ngim base, to béba i mpam ya i yoñ libak li angel i mapupi; inyule Banga Nyambe ni Mbu-Mpupi ba ñéga nye ikété maliga momasóna ni hôla nye i bagal longe ni béba. Hana i titii ini di ntehe kiki mut a nsak i pañ yé a bak a gwé mbôndô to tômblô maok wo wé, inyu noode jubus nhémle i kété manoodana. A mboñ ki jôga li bihéñba bi mam bisu gwé, i yoña nye ikété bilama ni ngôñ nkoñ isi. Ndi to jam to jada i kété mam mana momasóna li nla bé heñel nhémle nu a mal wo lôñ yada ni Kristô i pes béba, ni i pes i nkoñ isi. Ndi manoodana mana ma nkônde ndigi tiigaha nye bebe ni Nyambe. Mut nu-mpe a ñôm nye hikéñ i ñem. Hala nyen minliba, li lehel-ñem, ngi-manôgla ni minjôha, ni minhanak mi mi nlôl ni baoo Nyambe ndi longe longe ba ba nkatba le ba yé bahémle, mam mana ma mbaba ñem u banga nhémle ngéda yosóna. Ndi lipém li ba ni Nyambe inyule nye a mbida ha bé ni lipôdôl li bôt, ndi a mpégdaha nyemete i boñ sômbôl Nyambe. A mbigda ndigi bibanga bi Yésu le:

... Ndi di nyémbél mam mana momasôna ndigi i jôl li nu a bi gwés bés. [Rôma 8:36-37]. Nhémle a nla bé piñgla dilo dibe, ñengbak ni bijôl bi gwét bi Nyambe gwobisôna, ni Mbu-Mpupi a nla ki lôôs manoodana, ka yé le inyu Yésu Kristô yak bés di nla yémbél, inyu bot ñem di gwéne i ntut u lipém u niñi bés bisu. Hiôdôt hi kiñ-ñem yé hi yé mapupi, hi mbai ki. Hémlé i yé nyambak mu ñem wé, yak Mbu-Mpupi a nyén mu. Angel Nyambe i i yé Banga Nyambe yon iyé ngi yé, i mbi-gdaha nye tik makak i i yé inyu ba ba nyémbél ni hônba letee i pam lisuk . . . “Nu a yémbél, ’m’a ti nye kunde i je mu ee niñ i i yé kété wom Nyambe. Nu a komol, a nok bé njiiha nyemb i nyônôs ba . . . To nje a komol, m’a ti nye puba hibaña, yag ni jôl li yondo nkédlak ngi hibaña hi. Nu ki a komol, a téédaga ki bibanga gwem m’a ti nye ngui . . . Nu a komol, a téédaga ki minson nwem, m’a ti nye ane ngi ngandak biloñ . . . Nu a komol a haba mbot i mpôp, m’a sas bé me jôl jé bisu bi Nyambe ni Angel yé . . . To nje a komol, m’a yilha nye jél i témpel i Nyambe wem, a pam ha bé kekikel . . . To nje a komol, m’a ti nye kunde le bés na nye di yén isi lôñ i yénte yem ane. [Masoola 2:7 ni 2:17,26 ni 3:5 ni 12-:21].

Di ntehe bot moni nyibлага munu kété titii ini, i i ñéba le nhémle a mal ti nyemete yak Nyambe ni nkus wé wonsôna. A nla ha bé ôbôs nkus wé inyu gwañga bi mam bi nkoñ isi, ndi a mbôñôl nwo i hôla diyeyeba, jôga lipe li nke i nsul Nyambe [hala a yé le likébla li yom yada i kété jôm], ni ti ki makébla mahogi inyu lipém li Nyambe.

Di ntehe koga ni hobi, bi bi ñunda le nhémle a gwé niñ mapupi a mboñ ki mam mé ni ihéga. A nhindis bé nyemete ni maok ma nhiuha, to je matjél ni minidik mi binuga, ndi to je bijek bi nlôl i béba. A ñôbôs bé nkus wé, ndi to hindis nyu yé i i yé témpel Nyambe, to nyamba siba ndi to liôt nye. A mil bé to makañ kiki bo toñ, bo ngit, bo jin, bo bobo, to gwañga bi bie bipe bi bi ntibil bé mut to ti nye niñ boga. Anje bijek bi bi nhee bé ngandak ndamba, ndi bi bak mapupi, ñem wé u nyila ndap masoohe. A nke hingéda i mitin i kété ntôñ wé, to i bale ngéda yé i gwé la pagda. A ngwés masoohe ngéda yosôna ni bahoma bobasôna: kiki bo i soohe nyetamatama, bo i kété ndap Nyambe, bo i kété bôt bé ba ndap. Inyule a nyile nhémle a nla bé niñ ibale a ta bé ñadbaga ni Nyambe i kété masoohe hikel.

Nyiblak kaat ikété titii ini i yé Kaat Nyambe i nhémle a ñañ ni nigil hikel. Mu nyen a nléba pék ni ngui, niñ mapupi

ni lingwañ li a hoñlak bé i bana. Banga Nyambe i nyilna nye lambe isi makò mé ni pa-nsoñ i jòs ñoo. I yé tik jam inyule i yé bijek bi Mbu hi ki kel inyu niñ yé, ni malép ma niñ ma ma mélés nyus, ni lép inyu jogop jé ni léman i homa a ntéé nyemete. A nhônba i bege mbassa yé, inyule a ntibil yi le a nla bé kòs ntut wo ki wo ibabé mbassa. Laki a nyi le a bituge lôñ yada ni Kristò inyu niñ yondo, jon a nyéñ ndigi mam ma yé nyoo ngi, ma ma nom i boga ni boga, to laki ma nene bé hanano. A yé nkôðbaga i boma Nyambe, a bak ki ee i mbéla i ngwañ lép, i i num matam hikel kiki lel i banga nkô, ndi numuk ki matam ngandak. Mut nunu a gwé bé woñi nyemp, inyu liyonok a yôni ni Mbu-Mpupi, Gwéha Nyambe i nlôðha i nyon ñem wé [Tjémbi 1:1-3; Yohanes 15:1-14 ni Yôhanes Bisu 4:18-21].

Yésu a nkal le: “Men me yé bitugne me yé ki niñ, nu a nhémle me to a nwo ya a niñ; ndi to nje a yé nom ndi a hémle me a wo bé kekikel [Yôhanes 11:25-26]. Nu a ñemle banga yem, a hémlege ki nu a om me, a gwé niñ boga; a pam bé to bikéhene, ndi a ntagbe nyemp a yé i niñ [Yôhanes 5:24]. Nyemb i nyumus bé nhémle ndi to kônha nye woñi. Yémbél i Yésu ngi mbasa i bi milba nyemp. Qô! a nyemp, ngui yoñ i yé he? A soñ, yémblene yoñ i yé he? Ndi mayéga ma ba ni Nyambe nu a nti bés yémblene inyu Nwet wés Yésu-Kristò [Korintò bisu 15:54-57]. Mut a bi hiôm ni Nyambe a niñ ki ni nye a gwé ha be woñi u nyemp. Ibale ngéda manyodi mé hana nkoñ isi i nkola, a nke ni nsañ kiki ñôma Pauôlô a nkal le: Me gwé banga ngôñ keñi i niñ ni Kristò, inyu yem hala nyen a yé me yéñe. [Filipi 1:23]. Nhémle a nihbe i bemp ngéda a ga téé su u Yésu nu a bi wo inyu yé ngi mbasa, a somp ki nye ni matjél mé momete. Mbu-Mpupi a nhoñlaha nye bibanga bi Yésu, ki a kal le: ñem nan u yôm bañ, hémlana Nyambe hémlana ki me, ngandak mayéne i yé ndap Tata, me ga timba lo, ndi me yoñ bé meni, le nyoo homa me yé, yak bé ki ni yén ha [Yôhanes 14:1-4].

Mam jis li ma tehe bé, to ma ôð u ma nok bé, ni ma mut a bak ngi hoñol ikété yé ñem, mam mana momasôna mon Nyambe a nkôðbana bôt ba ngwés nye [Korintò Bisu 2:9]. I kété mahop momasô bôt ba mpot, to hilémp to hiada hi gwé bé bibuk bi bi kôli inyu kobol, to unda lipém li mayéne ma ngi ma yé le Nyambe a nkôðba inyu ba ba yé le, i hémle ba nhémle Yésu, baga bana ibôdól hana isi.

TITII JÛM

Munu i titii ini nyen di nla tibil nok bilama bi nyemp banga nhémle nu a yé i Kristô. A nla ha bé tehe titii nyemp i i nkônha woñi, ndigi angel i Nyambe yon a ntehe. Angel ini



JÛP MASÉ NI LIPÉM LI NTOHOL WOÑ

yon i mbemb ngéda i inyu éga bebe ni Nyambe mbu u u yé le u mal pubhana i kéte matjél ma Yésu. Nu a mal sômba ni

ndamba keñi, niñ yé ni mbu wé bi mal hohla ni ngata i nyemp. Hanano bi nyoñ njel i ke yak Nu Niñ, nu a wo hana nkoñ isi inyu tohol baboñ-béba i kété nyemp boga. Nyambe a nkôô-ba i bemp nye ni masé ni bibanga inyu malo mé malam. Ni Nwet wé a kal nye le; “ñ a longe nkol maliga, u bak maliga inyu ndék mam, jon m’a téé we inyu ngandak mam, jôp masé ma Nwet woñ. [Matéó 23:21]. Satan a gwé ha bé ngui inyu yé, inyule nyemp bapupi i yé tik jam i mis ma Yéhôva [Tjémbi 116:15]. Ni me me nok kiñ i nlól ngi i kalak le: Tila le, Masoda ni bawoga ba nwo i Nwet ibôdôl hanano; ñ, Mbu a nkal le, b’a noi inyu ndumba yap, inyule minson nwap mi nkiha ni bo [Masoola 14:13]. A we nu u ñañ i léman i ñem ini, nyambe a hôla we i ti ñem woñ yak nu a ngwés we, inyule ngéda ini a mpôdôs we a kalak we le: “A man wem, a ngond yem, ti me ñem woñ [Bingéngén 23:26]. Ibale ñem woñ u yé nwaak, ti wo Yésu, ti nye ñem woñ malôga ni u u nok njôghe, ndi nye a ti we ñem yondo ni mbu yondo. U lôgba bañ wemete ikété biyômôk bi ñem woñ, to i kété bisômbble gwé inyule mut a gwéne bôdôl ni ñem wé, nyemete a yé jôñ, ndi nu a nhiumul i kété pék Nyambe a tohlana [Bingéngén 28:26]. Nwas béba yoñ, téñbe ni telep-sép, inyule nsaa béba u yé nyemp, ndi likèbla li karis li Nyambe li yé niñ boga i Yésu-Kristô Nwet wés. [Rôma 6:23].

A we nu u bi ti niñ yoñ yak Nyambe, kôbda banga banga jam u bi kôs inyu hémlé ni gwéha bi bi yéne yak Yésu-Kristô; i kolbaha ni ki ñôma Pauôlô a ntila i kété kaat Timôtéó Ba 1:12: “Inyule me nyi nu me bi hémlé me nyi ki longe longe le a gwé ngui i tééda jam me bi ti nye i kepam i yokel nu. Hólôs wemete ni hémlé i pupi, u soohege ni ngui Mbu-Mpupi, ti wemete i kété gwéha Nyambe, u béngege Yésu, nu a yé njel, a yé maliga, a yé ki niñ. Nyen a yé Nwet wés nu a yé bebe i lo yoñ bá ba yé bé “Kiñe bikiñe, Nwet nu bet”.

Ndi inyu nu a gwé ngui i tat bé le ni kwo bañ, ni i téé ki bé bisu bi lipém jé ni masé makeñi ibabé nsohi, Nu a yé mpom Nyambe wada ni Ntohol wés le Yésu-Kristô Nwet wés, bibégés ni lipém, ni ane, ni lipémba ba ba ni Nye, ilo bibéé, hanano ni letee ni boga [Yuda 24-25].

Loñ yada i yé, i nlôôha bilama, i nloo binjamuha.
Ni hémle di nla tehe yo nyoo nonok.
Inyule, nyoo Tata a mbemb bés
A ngwés leege bés nyoo liyogbene jé.

Mu pañ liyogbene jé, di ga tôp tjémbi dilam,
di bo-kimasoda.

Ndutu to gwiiha bi ga ba ha bé

Miñumnde mi ta ha bé ha, i homa masoda nu.

Copyright ANGP

COPYRIGHT
ISBN 0908367 47 3

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, tablettes, etc. de www.angp-hb.co.za ou comme une Application "Heart of Man" sur téléphones Android.

Este livro "O Coração do Homem" é obtido em mais de 538 línguas e dialectos falados em todo o mundo, a saber: (África, Ásia, América do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de www.angp-hb.co.za ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, a

l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.

As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos

informar. Pois nos gostaríamos de agradecer a Deus juntamente convosco, e lembra-lo sempre em nossas orações.



For free Gospel literature, books and tracts in over 538 languages, write to:

Pour obtenir gratuitement de la littérature évangélique, des livres et des traités en plus de 538 langues, écrivez à:

Para obter gratuitamente a literatura evangélica, livros e folhetos em mais de 538 línguas diferentes escreva para:

E-MAIL: info@angp-hb.co.za
info@angp.co.za

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

A Gospel Literature Mission financed by donations
Une Mission de littérature évangélique financée de dons
Missão de literatura Evangélica financiada por doativos

(Reg. No. 1961/001798/08)